

四庫全書

史部

欽定四庫全書

史部

宋史全文卷

二十八
上

詳校官編修_臣潘廷筠

編修_臣裴謙覆勘

總校官降調編修_臣倉聖脉

校對官助教_臣卜維吉

謄錄監生_臣張同履

欽定四庫全書

宋史全文卷二十八

宋光宗

庚戌紹熙元年上孝宗皇帝第三子也母曰成穆皇后
郭氏以紹興十七年九月四日生上于藩邸初成穆生
四男長曰鄧王愔即莊文太子是也次曰慶王愷次恭
王即上也次未命而夭追賜名恪贈使相封邵王二十
年上生四歲矣二月授右監門衛率府副率三十年五

月轉榮州刺史三十二年九月封恭王於是十六歲矣
孝宗受禪乾道元年立鄧王為皇太子二年七月詔皇
太子男皇嫡孫賜名挺除福州觀察使封榮國公恭王
男皇孫賜名挺除左千牛衛大將軍三年七月太子薨
謚曰莊文六年六月以知樞密院府為莊文太子外第
命榮國公挺與錢妃自東宮徙居焉七月乙巳太史奏
是夜四更後東北方火星順行在木星西南入宿各不
及一度占云木火台宿主冊太子當有赦時虞允文獨

相八月庚戌孝宗御垂拱殿允文乞留班奏事三省樞密院進呈文字訖執政下殿孝宗宣諭允文遣使祈請陵寢事允文一一奏畢復奏云臣累日齋心今日消吉有一大事方欲干犯雷霆之威冒萬死以請孝宗問何事允文奏曰自古人君即位一二年後必建立儲貳以隆萬世之統以係四海之心國家治亂安危之機無大於此故曰太子國之本也國本正而萬事理況今日聖志已定將大有為於天下若一旦敵敗盟連兵兩淮六

飛必須順動監國撫軍誰任其責臨事之變倉猝議之
常有不如人意處又陛下在位將十年而元良虛位中
外士夫共懷憂疑但往往畏死不肯啓口開陳爾臣蒙
陛下大恩付以心腹之託使定大計今日之事無大於
此無急於此日者木火合宿太史奏以為當冊太子天
心仁愛陛下昭示休祥願陛下上順天心下從人望早
出睿斷孝宗欣然云朕久有此意事亦素定但恐儲位
既正人心易驕便自縱逸不勸於學浸有失德不可不

慮朕更欲令練歷世務通知古今庶幾無後悔爾允文
奏云臣平日竊觀陛下至孝至篤豈不以宗社為念聖
慮最遠豈不以儲副為急所以遲遲至今亦必有說今
蒙宣諭益有以見陛下重惜神器封植國本為萬萬年
之永圖天下幸甚然臣之愚以謂此事不過審擇官官
使日間正言日行正道真積力久自然無不趣於正安
得有後悔又儲闈一開深居中禁常得在陛下左右日
親帝學何患不光明日與朝政何患不練歷以臣之愚

早建儲宮其所成就必遠過於外處潛邸孝宗曰丞相言極是但此事却有少遷次非久於選德殿還獨與丞相議之允文即奏云臣以愚忠所迫昧死有請敢意陛下遽賜察納臣無任感天荷聖之至容臣再拜謝恩謝訖復奏云此事願陛下早留聖念孝宗云甚好甚好不過旬日間二十五日壬申允文朝殿奏事至下馬處中使傳旨令右相留班孝宗以邊事一一宣諭允文奏對訖復奏云臣比者輒以早建東宮事有請陛下欣然即

賜開納今已踰旬日未準處分臣實憂懼孝宗曰此事已決偶數日來多事未及與卿商量允文援唐太宗事力以為請孝宗曰朕見唐太宗用兵取天下心甚敬之至議立太子乃引佩刀自決亦未嘗不笑之蓋處置家事何用如此今秋事向晚冬初又虜使來有一番禮數若於郊禮時或前或後降指揮如何允文奏云聖志果定以郊天慶成日降指揮甚好蓋日南至天正也孝宗云當用此日十一月辛巳大駕至郊壇齋於青城是日

午宰執奏事有旨令右相留班孝宗宣諭云立太子事朕但欲與丞相議爾如何允文奏云此陛下家事臣不當與臣記得太宗皇帝淳化末年召寇準於青州既入對太宗曰東宮未立如何準對曰此事問內人不可問大臣亦不可問中貴人亦不可惟陛下獨斷乃可耳太宗曰襄王可乎準對曰知子莫若父陛下若以為可願早降處分乃立真宗臣嘗讀國史太宗八子真宗第三觀準所對曲折之間但欲自太宗發之耳太宗英斷一

發千百世無有議之者此臣惓惓之忠獨有望於陛下也孝宗云今郊天後先欲加上兩宮尊號立太子可用春初允文奏云臣謹奉詔願陛下更無改易孝宗云只候兩宮禮畢便降指揮又微笑云朕家好事數件皆是丞相做了允文頓首謝七年正月丙子朔太上皇帝壽聖皇后受冊寶禮畢庚辰允文奏事紫宸殿乞留班奏云今兩宮冊寶禮成立太子指揮乞早賜處分孝宗曰丞相留意此事如此朕欲以中春上旬擇日行禮非久

於內殿更與卿議之又有少說朕欲立太子後餘一親王便欲令出鎮外藩不知本朝有何典故允文奏曰陛下止有兩大王若立一王為太子一王自留王邸侍陛下左右本朝亦無似此典故孝宗云朕之慮甚遠卿可於唐以前子細密加討論允文奉旨而退戊子進呈二月壬子晚朝孝宗御選德殿以立皇太子御札宣示大臣允文等奏元良天下大本陛下獨出睿斷為天下得人各再拜賀孝宗曰前世人主多以此為諱朕甚不取

國有儲副自古以然何諱之有允文曰唐太宗號英主
至此乃不能自決猶引佩刀以自向孝宗曰朕常笑之
雉奴仁懦太宗既知之矣卒不能奪以基禍亂皇太子
朕觀之熟矣他日親馭戎輅以撫六師監國之任不及
今早定何以繫天下心允文奏臣等受詔未敢行出恭
俟來日集百官宣布孝宗曰善定夕鎖學士院癸丑降
詔內出麻制皇第三子恭王惇可立為皇太子皇子慶
王愷判寧國府進封魏王三月丁酉上受冊四月庚午

御筆皇太子宜須臨安府尹蓋欲試以民事也九年二

月榮國公挺薨

莊文太子之子

四月上解府尹事淳熙元年魏

王自寧國府改判明州七年二月魏王薨謚惠憲他日

孝宗謂右丞相趙雄曰太子資質極美但尚少學問耳

每遣人來問安朕必戒之云且語太子切須留意學問

十四年十月高宗皇帝崩先是孝宗已有禪意嘗命有

司葺都亭驛其制侔德壽宮既而以天下不可奉三官

乃緩其事十一月己亥手詔皇太子可令參決庶務右

丞相周必大奏乞創議事堂於是詔以內東門司改為之十五年正月乙巳詔每遇朝殿令皇太子侍二十六年正月甲午皇孫柄封嘉國公魏惠憲王子也

惠憲皇兄慶王

愷

己亥周必大進左相留正右相丙午皇太后遷慈福

宮春坊姜特立見必大問曰宮中人人知上元後舉行

典禮今悄然何也必大謝曰此非外廷所敢與聞特立

不悅而退

罷特立
紹熙元年

己未詔德壽宮改為重華宮

後又改慈

福又改
德壽

二月壬戌內降禪詔皇太子可即皇帝位宣詔

訖百官入班殿庭百官稱賀畢孝宗移居重華宮

本末互見

淳熙十六年

立妃李氏為皇后后父道拜慶遠軍節度使

贈太尉諡忠毅先是道為湖北帥有九宮山張真牧至其第道命諸女拜之其中女慈懿后也真牧見之驚曰此天下人母我奈何受其拜邪人皆以為狂道心獨喜孝宗在潜邸聞是語即為上聘之時莊文太子錢妃之妹同選入宮中外皆心擬錢氏而后定選隆興二年封榮國夫人郊禮成進封定國乾道七年王為皇太子立

為太子妃至是正位號卒如張真牧之言云 詔以生
日為重明節 秘書即兼權吏部郎官鄭湜因轉對奏
言民力之困莫甚於此時蓋所取者皆祖宗時所未嘗
有而作備於後來所用者皆循習承平積弊而不量今
日之事力願先以清心寡欲躬自節儉為本然後明詔
大臣裁度經費除奉宗廟事兩宮給兵費之外一切量
事裁酌惟正之供濫恩橫例皆董正之然後使版曹會
一歲之入擇諸路監司之愛民而曉財賦者使之稽考

調度蠲其煩重以寬民力疏既出右丞相留正乃命中
司版曹檢正都司置局同共稽攷先是壽皇初左藏封
樁庫其法非奉親非軍需不支至淳熙末年往往以犒
軍或造軍器為名撥入內庫或睿思殿或御前庫或修
內司而有司不敢執也是時湜為勅令所刪定官因轉
對為壽聖言之至是又以為言然竟未聞有所施行云
左補闕薛叔似遷將作監右拾遺許及之遷軍器監
先是淳熙十五年壽皇從林栗之請復置遺補官以命

叔似及之上即位二人既遷併與其官廢之 三月秘書監丞沈清臣罷上初即位清臣自國子監丞遷秘書丞羅點薦為言事官不果用俄而為范處義論罷之初主管台州崇道觀繼又降二官清臣臨安人淳熙十五年因轉對歷詆時相者也 五月左丞相周必大罷必大與留正並相議論素不合上受禪必大已有罷意時羅點以奉常兼修注上密遣訪可為言事官者點薦葉適等八人皆意向與必大類者由是不果用於是左諫

議大夫謝諤遷御史中丞權兵部侍郎何澹除右諫議大夫澹初與必大厚為司業二年不遷正既相白用澹為祭酒故德正而怨必大至是首上疏攻必大必大求去再請而遂罷以觀文殿大學士判潭州諤以不論列必大改權工部尚書會知滁州范處義除殿中侍御史必大方懇辭除職典藩之命澹又論之處義亦助其說於是以前學士出守泉州先是呂頤浩初月椿錢大為民害高宗嘗諭秦檜令盡罷之未果乾淳間始減廣

德桂陽軍萬三千餘緡上登極以月椿錢有數額太重
去處令臺諫侍從同戶部長貳詳悉措畫聞奏當議斟
酌施行以寬民力尋用吏部尚書顏師魯等奏再減江
浙諸郡月椿錢十六萬五千緡有奇云

是年

紹熙元年

春

二月御史劉光祖取御史臺格摘其關於中外臣僚握
兵將帥后戚內侍與夫禮樂訛雜風俗奢僭之事凡二
十條奏乞付下報行令知謹恪上從之 是春右丞相
留正因奏事密以建儲為請上謙遜未皇也於是皇子

封嘉王矣逾月正復以為言上曰少徐議之上之受
禪也姜特立譙熙載皆以春坊舊人得幸頗用事自周
必大罷左揆久虛而亞參亦闕時特立知閣門事忽見
右丞相留正曰上以丞相在位久欲遷左揆而葉張二
尚書中擇一人執政二書孰先正不答明日以特立之
語於上前奏之且論其招權納賄之狀上大怒罷特立
閣職提舉江州太平興國宮夏五月御崇政殿賜余
復以下五百五十八人及第出身有差新進士廷射始

於淳熙二年壽皇嘗諭大臣欲令文士能射武臣知詩書於是壽皇特御射殿引詹曠以下按射翌日引第五甲及特奏名皆具襴笏起居易戎服以射正奏名中的中帖上垛者推恩有差特奏名五等人射合格者與文學其他例賜束帛凡用絹三千匹云是科丞相留正奏言射以觀德既不合格而復賜帛則似無謂此例可削去亦省費之一端也上從之 上受禪推恩潛藩舉人其恭榮二郡皆在蜀中時京鏜為蜀帥乃命三舉終場

不改名人並特赴類省試倍省額三十二人而取一人
一州共得二十六人議者以為濫因請廷試入第四等
以前者並賜第餘但文學出身云 殿中侍御史劉光
祖出為潼川府路轉運判官先是光祖自四川制置司
參議官召對除軍器少監何澹時以兵部侍郎出使使
還除右諫議大夫澹首劾左丞相周必大罷之光祖與
澹舊在館中相厚善嘗過澹澹曰近日之事可謂犯不
韙光祖曰周丞相豈無可論第光祖有短見近歲一宰

相去位所引之士斥逐殆盡班列為之一空周相之門
多佳士安得如許人代之時姜特立譙熙載以春坊舊
人頗用事光祖屏人語澹曰曾龍之事不可再也澹曰
得非姜譙之謂乎光祖曰然既而澹引光祖入便閣有
數客在焉光祖顧視則皆姜譙之徒始悔前言之輕發
也是春澹同知貢舉而光祖有臺官之除首上學術邪
正之章及奏名光祖被旨入院拆號與澹坐席甫逼澹
曰近日風采一新光祖曰光祖非立異也但常日為大

諫所言者今則自言之耳既出同院謂先祖曰何公見
公所上章數日為之恍惚日餌定志圓他可知也未幾
謝深甫除右正言至是先祖坐論吳端事忤旨而出澹
遷御史中丞議論自此分矣吳端者舊以巫醫為業上
在儲邸壽皇嘗有疾國醫不能瘉端治療有功慈懿李
后德之上既受禪擢閣門宣贊舍人又遷帶御器械澹
三上疏論之不報胡絃為給事中亦封還錄黃上以御
筆諭止之澹絃皆聽命先祖再上疏言小人踰分干請

而使給諫不得行其職輕名器虧綱紀褻主權是一日而三失也疏入上命大臣令都司諭止之光祖言益力上不樂先是光祖監拆號差誤士人試卷既舉覺放罪矣至是乃用前事徙光祖為太府卿由是遂出是夏議者請令監司州郡寬屬縣無名之取以紓民力時東南月椿錢歲為緡錢猶三百九十餘萬又有版帳錢者軍興後諸邑皆有之而浙中為尤甚於是知岳州劉俱會四縣版帳之額為二萬一千餘緡而無窠名者萬一

千餘緡乃與提點刑獄丁逢轉運判官薛叔似議取凡無名者盡蠲之舉岳陽一郡而言則其餘可知矣其餘郡未減者如故 秋七月命縣置推吏給重祿舊例諸縣不置推法司吏受賕鬻獄得以自肆議者請萬戶已下縣各置刑案推吏兩名五千戶已下一名專一承勘公事不許差出及兼他案仍免諸色科敷事件月給視州推吏減三之一委令佐選擇有行止無過犯諳曉鞫勘人充以一年為界即因鞫勘受賕並行重法然諸縣

多不奉行朝廷聞之乃勒令請領重祿如不受者勒停
所屬不幫支者從例受制書而違抵罪 八月庚戌命
同判太史局劉孝榮改造新歷去年十一月承節郎趙
煥言淳熙歷今歲冬至後天一辰詔禮部侍郎李獻著
作郎鄧駙秘書丞黃艾校書郎王叔簡同驗視至是乃
有是命孝榮乞與吳澤荆大聲同造焉 金人遣使來
賀重明節自渡江後北使往來皆傳其國之御名廟諱
而本朝止傳帝名至是黃裳以王府翊善奉詔接伴庚

子至盱眙裳問掌儀田愿高宗何以稱帝名而不稱廟諱愿云自祔廟後元未理會裳遂遣愿等持廟諱御名三紙以往北使副視之云前無此例愿答云此乃二十七朔之外第一番講禮帝名廟諱合有分別往返久之北使副乃謂愿云為我謝使副所言極是當理非不曉得止是來時不曾得朝省指揮止依得冊子上行難以專輒切望相諒裳乃已既而北使引接來傳彼國名諱自是以下至其父允恭稱廟諱者凡六人裳歸奏其事

乞後遣使人力議改正蓋隆興更成之時廟堂亟於弭
兵僅能正其大體而交際之文或未暇議蓋不止一二
也舊南使入境非遇置頓不許下車是後待南使禮益
恭或中頗稍遠使者則下馬就道傍民居煮茗或炙脯
溫酒食之北之掌事者必前僕其火南使乃遣人傳諭
北都管以無禮之故都管却馬遜謝又以柳條決其人
今館中執事者多中原遺民往往與三節人私語惟見
北人則亟避去 冬十月以左藏西上庫改稱封樁下

庫初紹興休兵後置御前樁管激賞庫孝宗受禪改為
左藏南庫淳熙末始併歸戶部已而言者謂南庫不歸
戶部今已二年而庫名尚存官吏如故乞併省孝宗曰
若盡廢庫名出入必淆亂可以左藏西上庫為名至是
改稱封樁下庫仍隸戶部焉 右諫議大夫何澹遷御
史中丞時王蘭為樞密使右丞相留正甚憚之雖上亦
不樂也澹初除中丞或諭澹使擊之澹忻然上章極其
醜詆詔降一官放罷他日上諭澹曰卿章疏猶未快此

人朕亦畏之 是冬追封三公主上三女長曰齊安郡主次文安郡主次政和郡主皆早亡及是乃追封焉

國朝薦舉之目自京職官至令錄其來遠矣元祐初司馬光始奏設文武十科以舉士其後又有舉將帥廉吏所知合舊陞陟自代等科凡十有一是冬乃詔監司帥守滿秩造朝陞對之際許薦所部人才一二人如無聽闕文武高下皆無所拘其後三年間在外被薦者八九百人朝廷不能盡用但令中書省籍記姓名而已 初

紹興之行經界也惟漳泉州三州以何白旗作過之後朝廷恐其重擾止不行是歲朱熹守漳州復以三州經界為請熹初為同安簿已知經界不行之害及到任會臣僚有奏請行於閩中者詔監司條具利害以聞監司下其事於州適與熹初意合即加訪問講求纖悉畢至以至方量筭造之法盡得其說乃奏經界不行之利害一經界詳略之利害一又得其所必可行之術三將不得行之慮一大略以為此法之行貧民下戶雖所深喜

而豪民猾吏皆所不樂喜之者皆單弱困苦無能之人
故雖有懇誠而不能以言自達不樂者皆才力辨智有
餘之人故其所懷雖實私意而善為說辭以惑羣聽恐
脅上下務以必濟其私而賢士大夫之喜安靜厭紛擾
者又或不能深察其情而望風沮怯則為不可行之說
以助其勢此則誠不能無將不得行之慮也是冬得旨
本州先行經界南方春早事已無及熹益講究冀嗣歲
可行而寓公豪右占田隱稅侵漁貧弱者所不便為異

論以搖之後遂有進狀言經界不便者詔寢其事而三州經界不行卒如所料云 保任京官犯贓連坐舊制也是歲趙雄所舉以贓抵罪用故事當削三秩雄時為使相若降三秩則應落率銳為銀青光祿大夫朝廷難之於是自衛國公降封益川郡公削其食邑二千而已其後周必大連坐亦自益國公降封榮陽郡公蓋用雄例云 湖北直便會子者隆興初總領王玠所創也初造七百萬緡乾道兌換後止餘四百萬淳熙十一年始

通行於京西路是歲梁總為荆湖總領會其已出應換之數得五百六十二萬緡遂亦造兩界焉每界各二百七十萬緡紹熙初詔廣南西路監司約束毋得科掛丁錢廣西郡縣貧薄凡民間父祖年六十以上而身丁未成者亦行科納謂之掛丁錢民甚病之至是禁止明年郊赦又申明之

李心傳曰余嘗謂唐之庸錢楊炎已均入二稅而後世差役復不免焉是力役之征既取其二矣本朝王安石令民輸錢以免役而紹興以後所謂耆戶長保正雇錢復不給焉是取其三也丁錢多為國所創因

而不除是力役之征蓋取其四也而一有邊事則免夫之令又不得免焉是取其五也孟子曰有布縷之征粟米之征力役之征用其一緩其二用其二而民有殍用其三而父子離今布縷之征有折稅有和預買川路有激賞而東南有丁絹是布縷之征三也穀粟之征有稅米有義倉有和糴而斛面加耗之輸不與是穀粟之征亦三也通力役之征而論之蓋用其十一矣民安得不困乎愚惡夫世俗之吏不知財賦本末源流顧以趣辦為能而撥其本也是故論而述之以待上問焉

辛亥紹熙二年春正月甲寅同判太史局劉孝榮吳澤荆大聲所造新歷成上之詔以會元為名辦辛未詔修紹熙會計錄先是秘書郎鄭湜轉對為上言今黃老之

官衛卒動以百數外戚家廟防護之兵多於太廟額外將校之奉錢半於正額外廷百執之費不足當閣門醫職近侍之半請明詔大臣裁定經費上自乘輿下至庶府除奉宗廟事兩宮給兵費之外一切量事裁酌罷其不急損其太過戶部亦請稽考內外財賦置紹熙會稽錄俟見大槩之後命戶部宰屬同共詳議而一二大臣公心叶意為之斟酌以其所減捐以予民至是命戶部尚書葉翥御史何澹等同為之未幾澹丁內艱去官後

亦未聞有所減也 二月庚寅前利州路轉運判官致仕孫松壽除直秘閣松壽鄆縣人力學登紹興五年進士第至乾道初猶未改秩剛方廉潔不求人知環堵蕭然衣食僅給澹如也居官決事多用經術嘗守漢嘉甚有惠愛年六十六即引疾乞致仕不許范成大入蜀引上皇慶壽赦與樊漢廣同薦于朝召赴行在固辭不起蜀人高之趙雄時在樞府因為上言其賢四年詔特轉一官賜三品服依舊官觀松壽復告老許之趙汝愚入

蜀復奏松壽掛冠勇退幾二十年內行素飭終始不渝
乞賜褒表以厲風俗故有是命松壽素清約晚而彌壯
然亦喜從釋氏游日拜佛以百數未嘗少勦年九十餘
乃卒蜀人號為牧齋先生 是春議者謂濫予橫賜無
以樽節請自今內諸司所給賜所營造所收索悉從有
司定為中制惟正之供濫恩橫例皆釐正之國朝有合
同憑由司者宮禁所由取索也歲取金銀錢帛率以百
萬計版曹但照數除破耳雖有歲終比部驅磨之令然

郎官第赴內東門司終日巍座而數濫自為會稽郎官
不得過而問焉畢事則卷牘尾俾之書名而已由是議
者以為請詔葉翥趙彥逾何澹同稽考其後亦不果裁
節焉夏四月初命銓試中選人簾試國朝銓試之法
凡任子若同進士出身之人皆赴建炎兵火後權停紹
興三年復舉行之去年國子司業許衡又奏乞中選人
就吏部長貳廳前簾試小經義一道或小賦或省題詩
一首試中然後許參選至是吏部條具如所奏內同進

士出身并恩科人更不簾試仍下四川制置司一體施行從之 考功郎官黃由建言今已增試律義自不須更簾試上曰簾試以革代筆之弊正當加嚴豈可廢也明年八月謝深甫又言銓試不中四十以上注殘零闕人乞令郎官就長貳廳寫律一條俾之解釋如或不通未得參注從之 五月癸丑置詳定敕令局差詳定官一員刪修官三員先是工部侍郎潘景珪言法令一書久不刪潤乞差官置局領其事上從之然未有所進也

庚戌命六院官始復入雜歷舊制六院恩數略視職事官而不入雜歷乾道以後浸重其選號為察官之儲
淳熙初龔茂良秉政以六院官班寺監丞之上其內弟林宓用是始封贈父母茂良南竄遂罷至是始復入雜歷在九寺簿之下焉 淳熙末壽皇復置補闕拾遺官上即位罷之御史中丞謝諤言其不可旋亦罷去自是近臣罕進言者是月太學生余古上書曰恭惟皇帝陛下春秋鼎盛自即位以來星見再周當思付託之重朝

夕勉惟求治之道為急乃或不然間者側聞宴游無度
聲樂無絕晝日不足繼之以夜宮女進獻不時伶人出
入無節宦官侵奪權政隨加寵賜或至超遷內中官殿
已歷三朝何陋之有奚用更建樓臺接于雲漢月榭風
亭不輒興作深為陛下不取也甚者奏胡戎樂習齋郎
舞乃使幸臣嬖妾雜以優人聚之數十飾以恠巾拖之
異服備極醜惡以致戲笑至亡謂也自古宦官敗國備
載方冊臣觀宦者之盛莫如方今上而三省下而百司

皆在此曹號令之下蓋自副將而至殿步帥各為高價
不問勞績過犯驍勇怯弱但如價納賄則特旨專除故
將帥率皆貪刻軍士不無饑寒兵器朽鈍士馬羸瘠未
嘗過而問焉設有緩急計將安出此為害之大者良由
公卿持祿保位備負全身如漢之石慶唐之蘇味道滿
朝皆小人也求海內不盜賊民生不塗炭日月不食水
旱不作可得乎臣願陛下以漢文帝為法唐莊宗為戒
問安侍膳之餘宮庭燕閒講讀經史無為南面或鼓琴

投壺習射以頤養神性享名教不窮之樂固高岳無涯
之壽豈不休哉上覽書震怒始議特旨編管言者救之
乃送秀州聽讀是夏左丞相留正復以建儲為請上
曰俟過官與壽皇議之既而諭正云壽皇之意亦欲少
緩之秋九月丁卯蔣介除閣門舍人免召試先是乾
道間壽皇倣儒臣之制增置閣門舍人以待武舉之入
官者先召試而後命又許轉對如職事官供職滿三年
與邊郡遂為戎帥部刺史之選云至是介有召試之命

丞相葛邲言介武舉第一人乞免試上從之 四川制
置使京鏜以京官知縣闕人為辭奏乞增放散員數朝
廷難之然自是以後或非時覃恩或制司奏請往往遞
趙一年開禧三年吳玠宣諭四川又請待班人不俟改
官一面注擬從之其後議者以為不然遂復舊制 是
秋蠲減廣東鹽額先是淳熙末壽皇以廣西鈔鹽事竄
詹儀之命除高雷化欽廉五州賣二分鹽外令官般官
賣如故餘鹽令廣東歲賣七萬五千羅去冬上用廣西

提刑吳宗旦之請頗損五州鹽直及所賣之數又用廣東提舉劉坦之之請減鈔鹽一萬籬戶部奏如是則歲失經費六萬三千餘緡上不之靳也至是廣東復言六萬五千籬猶有未售者又命減五十籬焉蓋潮惠南恩州既自產鹽而官復般賣往往計口而抑售于民是後朝廷暗損經費十萬緡而科抑少減矣御史中丞何澹以所生繼母之喪請解官持服矣既又上疏言不逮事請下臺諫給舍議之於是太學生喬嘉朱九成黃會

卿移書責之其略曰竊謂人之大倫莫重於父母禮有出繼其服雖異而鍾於天性者未嘗不同也故所承父母則三年終喪而所生父母則心喪三年閣下自長成均而更長臺諫此三綱五常之所係者也今聞閣下有所生繼母之喪初請于朝欲解官持喪太學諸生莫不義之繼聞上疏稱解逮事不逮事之異中外閥然雖愚者亦以為駭夫禮經所謂逮事父母則諱王父母不逮事父母則不諱王父母非謂無恩於先祖也蓋逮事父

母則親聞父母之言所嘗諱其祖不逮事父母則不聞
父母之言所嘗諱其祖是以子莫知其所諱也故本朝
方慤解此一節以謂特庶人之禮耳若學士大夫則知
尊祖矣何逮事不逮事之拘乎今聞閣下引此欲不持
喪恐與禮經相反何者禮經謂逮事父母則從父母之
言今閣下所生之父果以繼室為正乎若所生之父果
以繼室為正則閣下亦當從而為正不得黜之也今四
十餘年以所生繼母事之及其終也反以為生不逮事

而不持心喪可乎夫閭下之意必謂所生繼母無生我之恩則不當為所生之母服抑不思黜其所生之繼母是賤其所生之父也為人子者尚忍言哉不然必以生我者為正而繼之者為不正是閭巷小人知有母而不知有父者非天理之公也非人倫之正也閭下為天子耳目之官將以厚人倫移風俗正宜致辨于此時澹方待命六和塔得書遂去官焉 冬十一月壬申日南至合祭天地于南郊大赦天下上之在齋宮也聞貴妃黃

氏薨始得疑疾郊之日風雨大至上震懼始不憚自是宗戚大臣以薨卒間者多不信矣

壬子紹熙三年春上昉御內朝而疾未盡去是後重華溫清之禮以及誕辰節序屢以壽皇傳旨而免既而上神思浸清宰輔百官下至韋布之士以過宮為請者甚衆至有扣額引裾號泣而諫者聖情開悟屢有翻然夙駕之意而不果行都人甚憂之三月己亥伶人胡永年積官至武功大夫以該遇去年郊恩乞任子吏部尚

書趙汝愚奏永年以樂藝出身難以任子望立為定法
今後似此雜藝補授之人不許奏補從之 夏四月從
事郎吳綱年九歲能誦六經語孟特改承務郎綱壽聖
皇太后親姪孫也紹熙間童子求試者十有七人無補
官者 皇伯嗣秀王伯圭拜太師初秀安僖王子偁者
太祖少子秦康惠王之五世孫也子偁長子伯圭也其
次普安郡王是為壽皇紹興十三年子偁薨于秀州贈
太子少師壽皇為皇太子加贈太師追封秀王謚安僖

上即位始詔即園立廟如濮王例伯圭初以國蔭出官
淳熙慶壽禮成拜安德軍節度使九年遷少保封滎陽
郡王十五年遷少傅十六年遷少師始稱皇伯紹熙改
元遷太保封嗣秀王是夏有太師之命本朝前此親王
生拜太師者五人真宗朝楚王元佐仁宗朝燕王元儼
哲宗朝吳王顥欽宗朝燕王俱越王偲皆以父兄行乃
得之伯圭以宗室拜太師蓋王於上為親伯父用優禮
也蜀鹽自祖宗以來皆民間自煮之歲輸課利錢銀

絹而已紹興二年趙開總計始變鹽法盡權之置合同場以幾其出入引法初行每百斤為一擔又增十斤勿筭以優之令商人入錢請引井戶但如額煮鹽赴官輸土產稅然鹹脉盈縮不長久之井戶月額不登則官司但以虛鈔付之而收其筭引法由是壞井戶既為商人所要因增其斤重以予之每擔有增至百六十斤者是夏吏部尚書趙汝愚奏言趙開鹽法最為精密今井戶多鑿私井務以斤重多寡相高故鹽日多價日賤而其

法大壞乞行下總領所參照舊例施行從之於是四川
總領楊輔遣官覈去虛額剗開助筭二千有奇申嚴合
同場舊法禁斤兩之踰格者而重私販之罰鹽直由是
頗昂焉 乾道初壽皇初令戶部印造兩淮交子不得
過江南八年以交子易壞出行在會子收兌是夏議者
以淮上鐵錢多欲革其弊吏部尚書趙汝愚與從官陳
騏羅點謝深甫合奏乞印造兩淮會子三百萬貫付兩
路每貫准鐵錢七百七十淮東二分淮西一分依湖北

例三年一覈事下兩省臺諫議尤袤等以為可遂施行之仍分一貫五百二百者凡三等始許流轉至江池太平常州建康鎮江府興國江陰軍界行用應兩淮上供及戶部錢物並權發見錢三年令淮南漕司椿管而松江八州軍合發上供一半會子則許用交子通融起發於江淮東西總領所椿管焉 秋七月壬午瀘州騎射卒張信等作亂騎射營者本州禁兵也淳熙末起居舍人王卿月知瀘州賜予諸軍甚厚軍士浸驕張孝芳代

為帥欲矯其弊訓練無日又多役使之廩賜或有不時
給者是日信等作亂晨入帥府殺孝芳及其家又殺節
度推官杜美駐泊兵馬監押安彥斌訓練官雷世明軍
校張明等擐甲坐閱武堂召通判州事張恂安撫司屬
官郭仲傳使作奏言孝芳罪狀於是信自稱第一將衣
金紫出謝城中以術人黃叔豹為計議官分其兵為五
十二隊同謀者五十二人為隊長皆有爵秩叔豹又為
黃旗大書曰不叛聖主不殺良民時張明之子昌勇藝

為諸軍冠與軍士下進陰謀討之癸未夜密以告恂甲
申信即毬場大饗諸軍恂等皆與酒初行昌進擊殺信
于坐會者皆獸散進大呼曰不叛者從我諸軍唯唯從
之因執殺逆者二十餘人逆徒皆捕獲制置使京鏜
聞變調西兵千人討之未行而信已誅乃遣鈴轄司屬
官陳纘往瀘州措置纘至州十里留不行乃械繫逆黨
孫成凌遲于午門之外黃叔豹等三十三人皆就戮聚
其首以為京觀設孝芳位于午門之右割孫成心腑以

祭之事已平鏜奏孝芳死狀且上恂等功未報丘密復
以為言詔贈孝芳三官錄其子孫二人令總領所制置
司應辦葬事 張信之亂也京鏜帥蜀調潼川所屯御
前後軍數百往討之興元都統制吳挺者璘之子也劾
制司擅發兵於是樞密葛邲陳駿等進呈得旨令制司
具析命下而鏜已赴召丘密入蜀即奏言三屯遠在西
北兵權節制必寄之宣制司朝廷事計當然今軍帥徂
於陵夷反謂制司擅興違戾至此豈不大失本意乞下

戎司具析仍責令遵守舊制從之由是三屯頗知嚴憚
宥所謂狃於陵夷者蓋專指挺也 四川經總制錢額

理四百五十餘萬緡其一百三十一萬緡贍軍一百三
十四萬緡應副湖廣總領所一百六十九萬緡上供餘
六萬緡諸郡支用上即位因劉光祖之請捐湖廣三年
錢四百六萬八千緡對減鹽酒重額錢即此四川經總
制錢也然四路憲司歲撥湖廣錢實止六十萬緡而已
又以買發物價計之折閱中半僅為三十萬緡是歲楊

輔總蜀計又樽節三十萬緡以益之 是歲皇后李氏
歸謁家廟推恩使臣鄧從訓等一百八十人給事中尤
袤言其太濫時議者亦以為外戚家廟防護之兵多於
太廟請釐正之

癸丑紹熙四年春正月乙酉詔江上諸軍陞差統制至
准備將者令主帥解發三人赴總領所選擇一名事既
行諸將皆不以為便焉 命吏部尚書趙汝愚知貢舉
自熙豐以來宗室不差充考試官淳熙六年吏部尚書

周必大始請宗室充學官并考試八年正月遂命汝愚為省試別院考試官至是有知舉之命然外郡至今未有差宗室校試者蓋漕吏知守舊法而不知新旨也

三月吏部尚書趙汝愚同知樞密院事先是高宗嘗諭趙鼎曰唐用宗室為宰相本朝雖有賢才不過侍從而止乃所以安全之也久之因執政進擬又諭秦檜曰宗室賢者如寺監秘書省皆可以處之祖宗不用宗室為宰相其慮甚遠也然是時宗室至侍從者亦未有卓然

可稱者也乾道初汝愚以廷策冠天下已而趙彥中復以宏博中選一時皇族尤號得人至是樞府有關壽皇欲用汝愚既出命矣監察御史汪義端言高宗聖訓不用宗室為宰執疏留中不出汝愚家居力辭疏至十上上為徙義端軍器監給事中黃黼言汝愚事親孝事君忠居官廉憂國愛民至誠慊慊出於天性所謂青天白日奴隸亦知其清明者義端識見奴隸之不如不可以備朝列義端由此補郡汝愚猶不拜上謀於壽皇遂命

宰執召當筆學士申諭聖意謂高宗聖訓本以折秦檜之姦謀故答詔有乃若紹興之故實蓋有為而言況我壽皇之疇咨欲播告於衆蓋為是也汝愚乃受命是時大臣恭謝者多不得見壽皇欲見汝愚乃因葛邲陳騌等入謝相繼宣引汝愚入謝壽皇曰卿以宗室之賢為執政乃國家盛事卿在蜀時所進奏議甚善朕嘗觀此書可與資治通鑑並行其被聖眷如此 初趙汝愚為蜀帥建言舊法聽三考薦舉改官者皆以三考為一任

舉其成數而言今於三考之內未罷竒零日分輒敢並
旁干請已非法意今又該遇覃霈盡行補轉若一併許
於二考之外聽舉改官竊恐干進之徒與夫勢要皆豫
得為他日計而孤寒安分廉恥自將者欲脫選調愈不
可得欲望將選人一例許於第二任方得薦舉改官庶
幾仕進公平不妨寒畯之路不報至是汝愚入政府乃
舉行之又詔未成考人不以罪去者許於後任湊成三
考聽舉改官初任未成考者勿聽著為令 夏五月親

試舉人賜陳亮以下三百九十六人及第出身有差李
僑年五十四調成都府司戶參軍自以祿不及養乞以
一官回贈父母上嘉其志特詔以本官致仕父母皆予
初品官封蓋異數也 左丞相留正以論姜特立不行
待罪于六和塔特立麗水人以父死事得官頗能詩士
大夫或稱之淳熙中趙汝愚為福建安撫使特立為本
路兵馬副都監時海賊犯閩中特立以一舟先進遂獲
之壽皇以為才召為閣門舍人未幾司春坊事上即位

除知閣門事正為右丞相論其招權納賄之狀詔與外
祠是月丙戌除浙東馬步軍副總管又召赴闕賜裝錢
二千緡正上疏言唐憲宗將用李絳先出吐突承璀為
淮南監軍及召承璀還先罷絳相本朝名臣范祖禹作
唐鑑言二人不可並立于朝此書屢經聖覽今特立召
用臣合罷相與李絳一同不報正出國門待罪于六和
塔給事中謝深甫復繳召還特立之命上批朕閱其舊
臣無辜而去特與書行同知樞密院事趙汝愚亦以為

言上不聽六月己巳正又言臣與特立理難並立于朝乞早賜處分上批成命已行朕無反汗卿宜自處時正已待罪上亦不復宣召也六月除陳源內侍省押班初源以得罪壽皇貶建寧府居住籍其資以進德壽宮又移郴州上即位復召還至是乃有是命時上已病不能過宮源數離間焉是夏嘉王府翊善黃裳除兵部侍郎去翊善坐論鄭汝諧事也先是淳熙末用丞相留正薦裳自秘書郎除翊善其後遷起居舍人歷中書舍

人給事中皆兼翊善至是裳辭兵侍不拜嘉王為之請
後月餘改實謨閣待制仍兼翊善蓋終始六年云 秋
孔文遠襲封衍聖公紹興中文遠之祖玠避難渡江高
宗以衢州田五頃賜之玠卒以其子搢為右承務郎襲
爵奉祠事淳熙中入侍祠擢知建昌軍久之坐妄用庫
金貶秩遂不復用焉紹熙初累遷至朝散大夫至是搢
卒詔以其子文遠為承奉郎襲封衍聖公云 冬十月
乙未同知樞密院事趙汝愚以乾道間所置軍期急速

文字牌及淳熙間所置緊急文字牌率與常遞混糴故
行移稽緩乃改作黑漆紅字牌奏委逐路提舉官催督
歲終核其遲速之甚者以議賞罰從之是後尚書省亦
踵行之仍命逐州通判具出入界日時狀申省久之稽
緩復如故紹熙末丘寔為蜀帥始初擺鋪以健步四十
人為之歲增給錢八千餘緡月以初三十八兩遣平安
報至行在率一月而達蜀去朝廷遠始時四川事朝廷
多不盡知自初擺遞以來蜀中動息靡所不聞凡寔劾

疏中所言皆擺遞之報也 十一月戊寅上朝重華宮

辛巳左丞相留正復入都堂視事先是正以論晏特
立事不行待罪于六和塔復繳還上前後所賜賚及出
身以來告敕且上奏自叙嘗陪侍儲邸及翌輔初政乞
保全終始詞指甚哀不報正累不得命乃復待罪于范
村之佛寺奏乞歸田里不許又請住給廩祿詔權行住
支頃之百官啓逢重明節于明慶寺正請就范村詔從
其請九月丁卯百官上壽紫宸殿詔以右丞相葛邲為

班首而正自請立少保班上壽班退復還范村待罪始
正之出國門也諫官章穎以劄子留之起居郎陳傅良
請直前奏事上諭閣門止勿進時上以疾不過重華宮
者已數月從官數以為言至是過宮禮畢特遣右司郎
官徐誼召正于城外正始入朝赴都堂視事命特立仍
為浙東路總管遂竟不召焉正待罪凡百四十餘日特
立有詩數千篇號梅山集揚萬里為之序云 十二月
甲午朔草澤王孝禮言今年冬至日影表當在十九日

壬午而會元歷乃在二十日癸未係差一日蓋陳得一
劉孝榮所造四歷皆未嘗測影只是寫擬分數所以後
天乞將修內司所掌銅表圭面降付太史局測驗從之
紹熙初命帥守監司薦所部人才既而濫薦者多是
久言者謂今被薦者猥衆朝廷疑其私而不信病其衆
而難從其間縱有賢才不免與僥倖者並棄請條約之
乃詔帥守監司今後毋得獨負薦士是冬使人自金
國回者言金人問朱先生安在答以見已擢用回白廟

堂遂除朱熹為荆湖南路安撫使知潭州先是已除熹帥廣西熹不就於是以辭遠就近不為無嫌力辭新命朝廷不許

甲寅紹熙五年春三月壽皇不豫夏四月朱熹始拜命赴潭州五月至鎮壽皇疾浸棘上不能過宮視疾人情益懼戊寅以壽皇服藥故赦天下先是嘉王府贊讀黃由乞令嘉王過宮問疾辛巳上奏未報講官彭龜年沈有開繼以為請甲申省札下許之內侍都監王

德謙堅請覆奏王斥其說遂行至重華宮壽皇為之感
動六月丁酉夜壽皇崩于重華宮上猶未能出嘉王數
入禁中泣請未遂中外訛言靡所不至戊戌宰執奏事
退太皇太后御札付宰執日下是宰執率百官詣重華
宮發喪辛丑左丞相留正知樞密院事趙汝愚參知政
事陳騤同知樞密院事余端禮率百官詣文德殿拜表
畢退就重華殿廬議成服典故端禮引唐肅宗朝羣臣
發哀太極殿故事附中使王公昌入奏是日太皇太后

有旨皇帝以疾聽就內中成服壬寅正汝愚請太皇太后垂簾奏事不許丁未宰執札子奏皇子嘉王仁孝夙成學問日進宜早正儲位以安人心癸丑再入札子御批云甚好乙卯再擬指揮進入乞付學士院是晚批出八字云歷事歲久念欲退閑左丞相留正得之大懼不以示同列汝愚逼之乃以告焉丙辰再擬入御批可只今施行己未宰執再奏乞面奉處分是晚付出封題稍異正不啓封付之內降房是夏御前諸軍都統制兼

知興州充利州西路安撫使吳挺卒先是虞丞相允文
既沒朝廷復命挺充利西帥凡十九年而卒于軍於是
四川總領楊輔先事白朝廷乞擇重臣鎮蜀乃以丘宗
為制置使宗未入蜀而間挺病甚恐其軍五六萬人緩
急無所屬乃見大臣籌之故事帥臣闕以轉運使權時
楊虞仲為利路轉運使宗欲重其事乃奏乞令輔往興
州攝帥上許焉輔以為朝臣出使非制閫所當令不欲
行而宗以聖旨移文輔重傷其意即請虞仲權知興州

事而已。遥領安撫使未幾，併以印送虞仲，就權人以為得體。先是，挺之季歲關外羣盜縱橫，皆縱而不治。虞仲至未久，遂捕其尤者悉誅之。邊人龍言服挺之死也。上已屬疾，不之信。趙汝愚在樞府，用宓輔二人之議，更遣張詔代之。蓋不欲吳氏世襲以銷未然之患也。是夏，始釐正東西兩川牒試之濫。牒試者，舊制以守倅門客皆引嫌赴本路轉運司別試。若部使臣及帥臣親屬門客，則赴鄰路試，率以七人而取一人。紹興後，牒試尤多。東

西兩川尤甚議者以為濫於是令成都府路以八十三人潼川府路以八十人為額至是王溉自成都府路轉運判官召還入見極言兩路冒親詭貫之弊乞各存十人外均與本路諸州從之仍各以二十人為額丘密為制置使復請每路止存十二人若就試者少則以二十人而取一人奏可舊例避親舉人與命官鎖應者同試王溉為成都漕始令分場以草假手之弊於是四蜀皆一等施行焉 秋七月庚申朔前一日付出宰執所奏

事左丞相留正不肯啓封是日知樞密院事趙汝愚趣之乃啓封正視牘尾憂形于色始密為去計矣辛酉上正臨朝仆于地都人聞之大駭是日工部尚書趙彥逾見汝愚白事相與泣下汝愚微以翼戴之事諷之彥逾力贊之汝愚遣中郎將范仲壬告殿帥郭杲仲壬初以時事艱難告之不應又以忠義動之又不應仲壬不得已屏人起立具以汝愚意達之又不應仲壬乃還汝愚知不可遂請彥逾往見杲諭杲曰彥逾謂杲曰彥逾與樞

密第能謀之耳太尉為國虎臣此事專在太尉果未及
言彥逾變色責之曰太尉所慮者百口之家耳彥逾盡
誠以相告而太尉了不見答即西府有問何以復之耶
果徐曰致意樞密領鈞旨事然後定 壬戌大祥左丞
相留正以五更入奏致其仕易肩輿出城而去人情益
懼正之未達也有善軌革者推其行年至甲寅乃為免
伏草鷄自焚之象殆莫可時殊恠之及是深以為憂私
謂所親曰主上卯生吾酉生伏草自焚其兆已見矣遂

定逃歸之計 時左丞相趙汝愚知太皇太后深以宗社為憂將白事焉而難其人有知閣門事韓侂冑者太后女弟之子也素善慈福宮內寺張宗尹而與永嘉人蔡必勝同在閣門必勝因其同郡人左司郎官徐誼吏部員外郎葉適言於汝愚遂令侂冑以內禪事付宗尹入奏太后素簡嚴無他語第令諭汝愚耐煩而已癸亥侂冑再往不獲命遂巡欲退重華宮內侍闕禮問知其謀入白太后言與淚俱太后感額久之曰事順則可更

切子細禮遂簡侂冑以來日壽皇梓宮前垂簾引執政
時日已過午矣汝愚乃以諭參知政事陳騏同知樞密
院事余端禮闕禮又使所親閣門宣贊舍人傅昌期密
製黃袍時嘉王在邸殊不知且方以疾在告汝愚簡官
僚彭龜年云禪祭重事王不可不入甲子禪祭殿帥郭
果與步帥閻仲先分兵衛內北內太皇太后垂簾命闕
禮引嘉王先入執政奏事太后曰皇帝已有成命相公
當奉行汝愚出所擬太皇太后聖旨云皇帝以疾至今

未能執喪曾有親筆自欲退閒皇子嘉王可即皇帝位
尊皇帝為太上皇帝皇后為太上皇后太皇太后覽畢
云甚好遂勸王即位王固辭且顧汝愚曰某無罪恐負
不孝之名關禮等以黃袍進王拒却不受汝愚等固以
請而端禮之言尤力王揮涕勉受遂即皇帝位汝愚等
再拜賀上猶答拜汝愚等又固請上乃衰服出見百官
于重華殿東廊之素幄次詣几筵殿行禪祭禮都人聞
之始奠枕矣是晚沈有開彭龜年乞奏事上慘然久之

曰前日聞大臣有建儲之議此亦可以息浮言安人心
今匆遽乃爾早泣告慈福不允至今悸動 是日詔建
泰安宮以奉太上皇帝太上皇后命泰安宮提舉楊舜
卿往南內請八寶 遣內侍二員分水陸路宣押留正
赴都堂治事從趙汝愚之奏也 乙丑太皇太后有旨
崇國夫人韓氏可立為皇后 丙寅赦天下常赦所不
原者皆除之百官進秩二等賞諸軍赦文有曰冲懷每
念於退閑親翰嘗頒於近輔用太上皇帝御札八字意

也其後命繳御札八字付史館從李璧之請也先是京口諸軍訛言詢詢襄陽歸正人陳應祥亦謀為變舉事前一日登極赦書至遂敗時趙汝愚為政首裁抑僥倖以故人多怨者自祖宗以來人主登極凡列郡守臣率得任子恩間有關守臣而以幕職班行攝之者亦官之如例英宗即位司馬公時知諫院嘗以為言不聽上受禪肆青汝愚因進熟始命監司郡守許上表進貢推恩內守臣係權官者免進貢其表聽附遞以聞詔車

駕五日一朝泰安宮百官月兩朝以即位告于天地
宗廟社稷丁卯侍御史張叔椿劾留正擅去相位詔
以叔椿為吏部侍郎詔命起居郎兼權中書舍人陳
傳良還故官戊辰詔曰朕猥以冲人肆膺大寶涉道
尚淺何以周知羣下之情燭理未明何以裁決萬幾之
務思欲圖久莫先求言惟祖宗二百年之基既艱於負
荷矧中外億兆人之衆尤重於撫綏聿懷置器之安采
切履冰之懼固當咨詢故老夢想幽人罔間邇遐咸當

播告胷臆結約爾其無愛於肆言利害罷行朕欲深求
於成敗事關朝政慮及邊防應天之實何先安民之務
何急毋憚大吏毋諱眇躬倘有補於國家當優加於賞
賚導人使諫方傾聽於嘉謀事君以忠宜大伸於直道
咨爾多士體予至懷 左司諫章穎為侍御史右正言
黃艾為左司諫 大理少卿鄭湜為金主報登位使左
驍衛郎將范仲壬副之 己已知樞密院事趙汝愚兼
參知政事 庚午召秘閣修撰知潭州朱熹赴行在奏

事上在嘉邸聞熹名德每恨不得為本宮講官至是首
加召用先是黃裳為嘉王府翊善善講說開導上學頗
進一日上皇宣諭曰嘉王進學皆卿之功裳再拜謝因
進曰若欲進德脩業追蹤古先哲王則須尋天下第一
等人迺可上皇問為誰裳以熹對彭龜年繼為官僚因
講魯莊公不能制其母云母不可制當制其侍御僕從
上問曰此誰之說對曰朱熹之說自後每講必問熹之
說如何蓋傾心已久故即位首加迅召皆出上意也

辛未顯謨閣待制兼侍講黃裳為給事中起居郎兼權
中書舍人彭龜年並為中書舍人將作監黃由為起居
郎秘書省著作郎沈有開為起居舍人 乙亥趙汝愚
為右丞相參知政事陳騤知樞密院事同知樞密院事
余端禮參知政事兼同知樞密院事汝愚辭不拜 賜
前宰執侍從詔訪以得失 丙子大風 戊寅詔以時
方秋暑宜用唐武德貞觀故事太上皇帝未須移御其
即以寢殿為泰安宮 殿前副都指揮使郭杲為武康

軍節度使上之立也知閣門事韓侂冑有力焉侂冑者
魏王琦之曾孫神宗女齊國長公主孫也趙汝愚推恩
定策功曰我與趙尚書皆宗臣而韓知閣乃右戚各不
言功惟爪牙之臣所當推賞由是杲建節焉於是侂冑
與趙彥逾咸有怨於汝愚矣 庚辰上率羣臣拜表於
泰安宮 辛巳改命少保保大軍節度使郭師禹為攢
宮總護使 趙汝愚力辭右丞相詔以為樞密使翰林
學士李燾草麻有太尉本兵柄之語汝愚以為侮已銜

之未幾獻轉承旨黃由時以左史兼中書舍人駁之乃
除寶文閣學士知婺州先是壽皇將勸勤並命周必大
留正為相獻草二制而於必大制中多所訓飭至有患
失容身之語必大不自安三上章力辭又四章求去其
辭免第二劄子有中外臣庶明知兩相制出抑揚不同
在於人情寧免觀望奏入壽皇召獻入對令貼麻改定
必大復以非材求去壽皇曰朕何嘗令如此措辭遂批
出李獻與郡明日將上乞除職名壽皇不許蓋獻兩在

禁林皆由草制而去位自是不復起矣 壬午侍御史
章穎等劾內侍林億年陳源楊舜卿與在京宮觀 知
閣門事韓侂胄落階官為汝州防禦使 癸未余端禮
辭兼同知樞密院事甲申兵部尚書羅點簽書樞密院
事 詔兩省官看詳應詔封事具要切者以聞 戊子
詔百官日輪一負面對

講義曰輪對國家之令典也朝廷之上有如宰執侍
從臺諫得以無時不言至若在下庶僚未及借玉階
而面天表者且有輪對之制焉誠如是則小大諸臣
悉能展盡底蘊於冕旒之前矣此真治世之氣象歟

罷楊舜卿在京宮觀林億年常州居住陳源撫州居住
八月己丑朔安定郡王子濤薨 辛卯初御行宮
便殿聽政 癸巳朱熹為煥章閣待制兼侍講告詞云
朕初承大統未暇他圖首闢經闡詳延學士眷儒宗之
在外須召節以趣歸徑登從班以重吾道爾發六經之
蘊窮百氏之源其在兩朝未為不用至今四海猶謂多
奇擢之次對之班處以邇與之列若程頤之在元祐若
尹焞之在紹興副吾尊德樂義之誠究爾正心誠意之

說豈惟慰蒲於士論直將增益於朕躬非不知政化方
行師垣有賴試望之於馮翊不如寘之本朝召賈傳於
長沙自當接以前席黃由之詞也

講義曰道喪千載聖遠言湮不有先覺孰開我人皇
宋火德當天離明興治列聖相承真儒輩出求其績
洙泗之道統者始則伊洛之學繼是則朱文公焉講
席而得若人真吾國之光華也所以哲宗元祐元年
即命伊川以通直郎充崇政殿說書寧宗紹熙五年
即命文公以煥章閣待制兼侍講二聖所以拳拳於
大儒者無他蓋將發明乎中庸大學之正傳推而
為治國平天下之事業焉耳豈徒曰誦說云乎哉

熹發潭州且行且辭大略謂陛下即位之初方將一新

庶政所宜愛惜名器若使倖門一開其弊不可復塞至
於博延儒臣專意講學蓋將求以深得親懽者為建極
導民之本思所以大振朝綱者為防微慮遠之圖蓋熹
在道聞泰安朝禮尚缺近習已有用事者故以為言

甲午增置講讀官以黃裳陳傅良彭龜年等為之 丁
酉以生日為天祐節 辛丑詔曰朕惟廉吏民之表而
為國之蠹民之病者莫汙吏若也不有誅賞疇示勸懲
繼自今諸道司刺舉之官於郡邑文武任職之臣廉必

聞汙必糾毋憚大吏毋縱私昵賞不爾靳罰不爾私其
令吏稱民安副朕意焉 己亥上率羣臣朝泰安宮

壬寅賜講讀官詔戒以開陳經旨救正闕失 皇弟許

國公柄進封徐國公柄壽皇之孫也壽皇三子五孫莊

文太子下曰豫國公挺魏惠憲王下曰左千牛衛大將

軍攄次即柄也光宗下曰保寧軍節度使挺次即上也

挺攄挺皆蚤卒柄後封吳興郡王 癸卯少傅嗣濮王

士歆為少師郭師禹為少傅奉國軍節度使開府儀同

三司夏執中為少保 乙巳詔晚講官坐講 禮部侍

郎許及之等請祧宣祖廟祔大行至尊壽聖皇帝詔侍

從禮官集議 丁未復罷經筵坐講 以諸路郡縣水

旱命三省條畫賑卹

講義曰晁錯說漢文帝曰堯有九年之水湯有七年之旱而國無捐瘠者以蓄積多而備先具也蓋天灾流行國家代有聖如堯湯且不能免水旱之憂所恃者有豫備之素焉耳國家列聖相承留心荒政既有義倉又有常平倉既有惠民倉又有廣惠倉諸倉諸藏所在充牣加以先正名臣位官郡邑又能推上德意而宣布之有如富鄭公之在青州趙清獻公之在會稽賑救有方野無餓殍載在國史班班可覈也後

之為國者則不然官之與民忽然如秦越之相視常
平義倉僅存其名平居暇日往往為貪利移用之資
脫遇凶饑搏手無策赤子替替惟有擠死溝壑而已
重磬之室隱雷之腹誰能軫念及此邪紹熙末年以
諸路郡縣水旱命三省條畫賑卹愚謂遇災而賑卹
誠是也然必倉廩無移用之弊郡邑有奉行之人則
早乾水潦不足為慮苟或不然愚恐廟堂雖條畫於
上而惠澤將壅過於下朝廷號令不過為墻壁之虛
文耳果何益哉

辛亥趙汝愚請於近畿卜地營建至尊壽皇聖帝攢

宮詔侍從臺諫禮官集議翰乙卯安南國王李龍翰加

號思忠功臣 詔廣西鹽額歲減十萬緡 侍御史章

穎罷為兵部侍郎左司諫黃受罷為工部侍郎 新除
煥章閣待制知建康府謝深甫為御史中丞深甫韓侂
冑之黨也侂冑以定策功意望建節恨趙汝愚抑之有
怨言簽書樞密院事羅點慰解之知臨安府徐誼勸汝
愚以節度使授之汝愚悟遣人諭意於侂冑侂冑答語
不遜遂日夜謀引其黨為臺諫官以擯汝愚汝愚踈直
不虞其姦會汝愚方奏除劉光祖為侍御史方進呈知
樞密院事陳騭忽奏曰劉光祖與臣有嫌今光祖入臺

願先避位汝愚愕然而止侂冑遂以內批除深甫為御史中丞蓋侂冑與駢合謀已久特汝愚未之覺爾監

察御史黃度為右正言

丙辰左丞相留正罷時朱熹

被召行至信州聞以內批逐首相有憂色學者問其故

熹曰大臣進退亦當存其體貌或曰此蓋廟堂之意熹

曰何不風其請去而後許之上新立豈可導之輕逐大

臣耶至六和塔永嘉諸賢各陳所欲施行之策熹曰彼

方為杞我方為肉何暇議及此哉是時近習用事御筆

指揮皆有其漸故熹深憂之 趙汝愚為右丞相 丁

巳詔侍從兩省臺諫各舉通亮公清不植黨與曾任知縣者二人 九月辛酉司農少卿劉光祖為起居舍人

丁卯大理寺主簿劉德秀為監察御史時趙汝愚奏乞令近臣舉御史許之始議除二人衆舉吳獵者最多而遊仲鴻次之德秀與韓侂冑深交侂冑乃諭中司令薦德秀因以內批令兼用中司所舉者一人德秀遂與吳獵並除其黨以次而進言路遂皆侂冑之人一時善

類排斥無餘黨禍自此起矣 己巳命趙汝愚朝獻景
靈宮庚午命嗣秀王伯圭朝饗太廟上以孝宗之喪故
也 是日羅點薨 辛未合祭天地于明堂赦天下詔
徒流罪人經登極赦免罪而再犯者不以明堂赦恩原
免是歲孝宗大漸嘗肆赦上登極又赦至是明堂肆眚
尚書省契勘一歲之間三行放赦恐有克惡累犯之人
指恩作過故降此指揮其指揮與赦又同降但以白紙
連書於黃牒前云 壬申刑部尚書京鏜簽書樞密院

事鏜亦韓侂冑之黨也故擢用之羣儉附和視正士如仇讎於是陳傳良吳獵劉光祖等咸先後斥去矣 甲戌下詔撫諭諸將 改天佑節為瑞慶節 己卯嗣秀王伯圭為安德崇信軍節度使 壬午禮部尚書黃裳卒 甲申韓侂冑為宜州觀察使詔侂冑歷事三朝備宣忠力可特遷二官蓋將以為承宣使也侂冑自負有定策功覬覦節鉞意不滿上䟽力辭乃止遷一官於是怨趙汝愚益深矣 冬十月己丑右諫議大夫張叔椿

再劾留正擅去相位詔落正觀文殿大學士 庚寅改
泰安宮為壽康宮 辛卯命四川待置司銓量諸州守
臣故事諸道守臣皆臨遣淳熙末孝宗以嶺蜀道遠始
詔川廣知州軍見居川廣合闕到半年前奏事人及係
見闕去處並令詣本路轉運司稟事仰漕臣精加銓量
人才委堪任使非昏繆老病之人結罪保明申尚書省
然諸道罕嘗舉行至是言者論漕司之權比制司為輕
而其責亦不若制司之重權輕則不敢多有所廢黜責

輕則不暇詳於顧計州縣不治職此之由請一付之制
司權重則雖廢黜之多而有所不憚責重則顧計利害
之深而不敢苟且如此則昏老病疾之人不得冒居而
州縣無不治矣趙汝愚為政遂白行之 是日朱熹奏
事行宮便殿其一曰天下之事有常有變而其所以處
事之術有經有權當事之常而守其經雖聖賢不外乎
此而衆人亦可能焉至於遭事之變而處之以權則惟
大聖大賢為能不失其正而非衆人之所及也乃者天

運艱難國有大咎天變為之見於上地變為之作於下
人情為之哀恫怫鬱而皆有離畔散亂之心是則所謂
天下之大變而不可以常理處焉者也是以太皇太后
躬定大策皇帝陛下寅紹丕圖而鄉之危者安離者合
天下之勢翕然而大定此亦謂處之以權而不失其正
矣然至今三月而天變未盡銷地變未盡弭君親之心
未盡惟學士大夫羣黎百姓或反不能無疑於逆順名
實之際猶有可諉者亦曰陛下之心前日未嘗有求位

之計今日未嘗忘思親之懷而已此則所謂道心微妙之全體天理發用之本然而所以行權而不失其正之根本誠能充吾未嘗求位之心則可以盡吾負罪引慝之誠充吾未嘗忘親之心則可以致吾溫清定省之禮終始不越乎此而大倫可正大本可立矣至於問安視膳之行十日一至而不得見則繼以五日五日一至而不得見則繼之以三日三日而不得見則二日而一至以至於一日而無不至焉俯伏寢門怨慕號泣雖勞且

辱有所不憚然而親心猶未底豫慈愛猶未復初逆順
名實之際不渙然而冰釋則臣不信也其二言帝王之
學其三言湖南財計其四言湖北徭人侵擾事 乙未

詔曰朕以不德嗣承大寶夙夜祇畏不遑寧處乃者陰
陽繆盪雷震非時淫雨為災朕心甚懼推尋厥咎未知
其繇凡朕躬有過失朝政有闕違其令臺諫侍從各條
數以聞無有所隱庚子以久雨命大理三衛臨安府兩
浙州縣決繫囚釋杖以下辛丑減兩浙江東西路和買

折帛錢蠲兩浙路丁鹽身丁錢一年 雅州嚴道縣沙

平徼外夷與碉門寨纔隔一水而寨在州西八十里沙
平凡六族其地有胡盧里歲輸稅米百二十斛於碉門
乾道間夷人高奴吉作亂焚碉門宣撫使王公明出榜
碉門撫諭夷人聽命自是捐胡盧里之稅與之而沙平
悉為夷人有矣至是元嶺夷人因沙平以叛土丁以神
臂弓射退之制置司命閉禁門者月餘夷人糧盡乃就
降 是日命朱熹講大學熹奏云臣伏見近制每遇隻

日早晚進講及至當日忽值假故即行權罷又按故事將來大寒大暑亦係罷講月分陛下天性好學晨夕孜孜雖處深宮必不暇逸欲乞今後除朔望旬休及過宮日外不以寒暑雙隻日月諸色假故並令遂日早晚進講內有朝殿日分恐聖躬久坐不無少勞却乞權住當日早講一次從之熹每進講務積誠意以感格上心以平日所論著者數陳開析坦然明白可舉而行講畢有可以開益上德者罄竭無隱上亦虛心嘉納焉 甲辰

趣後省看詳應詔封事翌日朱熹奏云臣前日面奏恭奉詔旨以雷雨之異許陳闕失仰見陛下畏天省己之意切見陛下登極之初已下明詔來獻言者甚衆未聞一有施行今復求言殆成虛語乞令後省官鎖宿看詳擇其善者條上取旨以次施行庶幾聞者知勸直言日聞詔差沈有開劉光祖看詳限十日聞奏 乙巳上大行至尊壽皇聖帝謚曰哲文神武成孝皇帝廟號孝宗詔以永思陵之東南為至尊壽皇聖帝攢宮紹興初六

飛駐越昭慈聖獻皇后上賓因卜地權攢于會稽上皇
村蓋便於修奉也及卜祔陵遂就其側併舉顯肅憲節
二后祔焉顯仁高宗繼從其兆則迫隘已甚矣高宗之
葬也趙汝愚時守蜀手疏論會稽殯宮淺薄可為深憂
宜復祖宗山陵之制朝論不從於是自昭慈之西連用
五穴山勢漸遠其地愈卑矣孝宗將殯汝愚為樞密使
建議以殯宮本非永制實居淺土蔽以上宮初期剋復
神京奉遷神駕雖其志甚美而其事實難且死者無終

極國家有廢興豈宜徒徇虛名以基實禍識者深以為然時日官荆大聲已卜地思陵之傍開深五尺下有泉石按行使趙彥逾以為土肉淺薄不可用汝愚乞改卜意欲以中軍寨為之而宰相留正以為不然於是彥逾與覆按使謝深甫附其說乃命大聲改卜於新穴之東視新穴纔高一尺一寸五分而已孫逢吉為覆按使還言當少寬時日別求吉兆而內庭左右以久居喪次內外不便皆主速葬之說乃詔侍從臺諫限三日進議

者皆言神穴未安自合展期改卜况朝廷禮文何嘗盡
循古制豈必拘七月之期奏劉光祖所草也朱熹時在
經筵復上議狀云切惟至尊壽皇聖帝聖德神功覆冒
寰宇深仁厚澤浸潤生民厭世上賓率土哀慕宜得吉
土以奉衣冠之藏垂裕後昆永永無極而議論紛紛迄
無定說皆緣專信臺史而不廣求術士必取國音坐丙
向壬之說而不博求名山以禮而言則記曰死者北首
生者南向皆從其朔又曰葬於北方北首三代之達禮

也則是古之葬者必坐北而向南孝子之心不忍死其親雖葬於墓猶欲其負陰而抱陽也豈有坐南向北反背陽而向陰乎若以術言則凡擇地必先論其主勢之強弱風氣之聚散水土之淺深穴道之偏正力量之全否政使實有國音之說亦必先此五者然後其術可得而推今乃信其庸妄之偏說但以五音盡類羣姓而謂冢宅向背各有所宜乃不經之甚者不惟先儒已力辨之而近世民間亦多不用今以為祖宗以來世守此法

順之則吉逆之則凶然自永安遷奉以來遵用此法而九世之間國統再絕靖康之變宗社為墟若曰其法果驗則洛越諸陵無不坐南而向北固已合於國音矣又何吉之少而凶之多耶臺史之言進退無據類皆如此又言今穴視前穴高一尺一寸五分則是開至六尺一寸五分即與舊穴五尺之下有水石處高低齊等如何却開至九尺而其下二尺八寸五分者無水石耶臣自南來經由嚴州府富陽縣其江山之勝雄偉非常說者

又言臨安縣乃錢氏故鄉山川形勢寬平邃密此必有佳處可用而臣未之見也切見近年地理出於江西福建為尤盛望下兩路帥臣監司疾速搜訪量給路費多差人兵輜馬津遣赴闕令於近甸廣行相視擇一最吉之處以奉神靈萬世之安其孫逢吉所謂少寬日月別求吉兆為上此十字者實為至論臣非敢妄以淫巫瞽史之言眩惑聖聽誠不忍以壽皇聖體之重委之水泉沙礫之中殘破浮淺之地是以痛憤激切一為陛下言

之疏入不報其後卒定永阜陵于會稽焉 丙午卻瑞
慶節賀表從朱熹之請也前一日晚闕報來日百官上
表稱賀熹欲不出不可乃草劄子明日立班投進略云
壽皇梓宮在殯陛下追慕方新乃以此時講行賀禮觀
此闕失心實未安欲望聖慈速賜傳旨便令權免其表
亦不收接庶幾上廣孝治益隆聖德風示四表垂法萬
世有旨却賀表不受熹尋奏前日賀表雖降出而未降
指揮今後合稱賀事三年之內並與權免其節序變遷

百官並合進名奉慰 庚戌改上安穆皇后諡曰成穆
皇后安恭皇后諡曰成恭皇后 壬子遣太常少卿曾
三復賀金主正旦 丙辰上孝宗哲文神武成孝皇帝
冊寶于重華殿成穆皇后成恭皇后冊寶于本室 是
月詔修葺舊東宮為福寧殿以備移御朱熹彭龜年等
請罷之 閏月戊午朔朱熹進講大學至盤銘日新因
論成湯有盤銘武王有丹書皆人主憂勤警戒之意丹
書蓋出大戴禮武王踐阼篇上曰近有人進入此書因

命小黃門取示蓋黃庭堅所書墨跡云 庚申吏部尚
書鄭僑等請併祧僖宣二祖正太祖東嚮之位詔從之
國朝自太祖追王僖順翼宣四祖以來每遇禘祫祖宗
以昭穆相對而虛東嚮之位王安石為政建議僖祖以
上世次不可知則僖祖之有廟與后稷疑無以異當時
諸儒如韓絳輩辨之不從熙寧八年夏禘于太廟以僖
祖東鄉自是無敢議者南渡後董至王普尤表俱請正
太祖東鄉之位未克行先是英宗祔廟已祧順祖欽宗

祔廟又祧翼祖及高宗升祔遂為九世十二室至是孝宗將升祔趙汝愚當國議欲併祧僖祖三祖於是僞等上此議又奏請立僖祖別廟以順翼宣三祖神主祔藏時朱熹在講筵獨入議狀條其不可者四條上召對仍於榻後取文書一卷曰此卿所奏廟議也可細陳其說熹先以所論畫為圖本貼說詳盡至是出以奏陳久之上再三稱善且曰僖祖自不當祧高宗即位時不曾祧壽皇即位亦不曾祧太上即位時又不曾祧今日豈可

容易可於榻前撰數語俟徑批出施行熹方慙內批之
弊因乞降出劄子再令臣僚集議上亦然之既退即進
擬詔意以上意諭廟堂則聞已毀四祖廟而遷之矣時
汝愚既以王安石之論為非異議之徒懼其軋已藉以
求勝事竟不行於是熹遺汝愚書曰相公以宗支入輔
王室而無故輕納鄙人之妄議毀折祖宗之廟以快其
私其不祥亦甚矣欲望神靈降歆垂休錫羨以永國祚
於無窮其可得乎時太廟殿已為十二室故孝宗既升

祔而東室尚虛熹以為非所以祝延壽康之意深不然之因自劾不堪言語侍從之選乞追奪待制章再上詔次對之職除授已久與廟議初不相關不許及光宗祔廟遂復為九世十二室云蓋自昌陵祔廟踰二百年而後正太祖之位自是年冬始而別建一殿以奉祧主于大殿之西隅歲命禮官薦獻焉今謂四祖殿者是也

講義曰按朱文公廟議曰僖祖祧主遷於治平不過數年神宗皇帝復奉以為始祖已為得禮之正而合於人心所謂有其舉之而莫敢廢者也又擬為廟制以辨議者一旦併遷僖宣二祖析太祖太宗為二之

失復引元祐大儒程頤之說以為物豈有無本而生者今日天下基本益出僖祖安得為無功業議狀既上廟堂持之不以聞即毀撤僖宣廟室更造別廟以奉四祖宰相既有所偏主而樓鑰陳傳良又復牽合裝綴以附其說然經生學士知禮者皆是先生焉

辛酉晚講侍講朱熹因奏曰臣所進講大學口義不審曾經聖覽否上曰宮中無事常看又奏陛下於臣妄說有所疑否上曰說得甚好無可疑又奏萬幾事煩恐講義卷軸大難於披覽欲寫成冊子進入以便反覆觀考上欣然曰正欲與卿說作冊子來可速進入久之未

敢上因入講上忽宣諭曰向日令卿寫講義冊子何久不進入奏曰未奉進止未敢遽上上曰速進來初熹既寫成冊子欲點句讀而未敢啓上忽曰可一就點成句來奏曰容遵稟進入既進上一日講畢奏曰臣所進入講義冊子必經聖覽上頷之又奏不知於聖意如何上欣然曰看來緊要處只在求放心耳熹頓首曰聖學高明宣諭極是老師宿儒窮日竟月不曾見得此意說得此語陛下天縱生知拈出此求放心語正是聖學要領

願推之以見於實行不患不為堯舜之君也他日熹又
奏疏言願陛下日用之間語默動靜必求放心以為之
本而於玩經觀定已用力處益用力焉數召大臣如仁
宗開天章閣故事至於羣臣進對亦賜溫顏反覆詢訪
以求政事之得失民情之休戚而又因以察其人才之
邪正短長庶幾於天下之事各當其理矣 乙丑右司
員外郎林季友為金國報謝使左領軍衛將軍郭正己
副之 戊辰金主遣使來弔祭 辛未遣職事官二員

核實鎮江府建康池鄂江州樁管錢米 乙亥工部尚

書趙彥逾為端閣殿學士知建康府趙汝愚之定大計也遣彥逾達意於殿帥郭杲事既定彥逾冀汝愚引己同升已而外除彥逾怨之遂與韓侂冑合未幾改除四川制置使彥逾愈恨入辭疏廷臣姓名于上指為汝愚之黨曰老奴今去不惜為陛下言之於是上亦有疑汝愚意矣 賜史浩諡曰文惠 戊寅侍講朱熹以上疏忤韓侂冑罷御批云朕憫卿耆艾方此隆冬恐難立講

已除卿宮觀可知悉趙汝愚獨袖內批還上且諫且拜
侂冑必欲出之汝愚退求去不許侂冑使中使王德謙
封內批以授熹熹即附奏謝遂行給事中樓鑰封還錄
黃舍人鄧駙面奏乞留熹上許除京祠已而不下起居
郎劉光祖又言之中書舍人陳傅良再封還錄黃有旨
除熹實文閣待制與郡劉光祖再上疏留行不報樓鑰
再封還錄黃有旨依已降指揮傅良疏中獨有朱熹論
事頗繁迂闊之語蓋侂冑嘗言陛下千乘萬騎而熹乃

欲令一日一朝豈非迂闊故時議謂傳良因廟議不合陰肆中傷云工部侍郎兼侍講黃艾因講問逐熹之驟上曰始除熹經筵耳今乃事事欲與艾悃請再三不已吏部侍郎兼侍講孫逢吉上疏留熹又因講權與之詩反覆以諷上曰朱熹所言多不可用時侂冑欲用優人王喜為閣門祇候逢吉誦言將入諫乃止蓋侂冑嘗令喜於禁中效熹容止為戲熒惑聖聽者故也監察御史吳獵入劄子乞留熹不報登聞鼓院游仲鴻上言朱熹

海內名儒首蒙收召四方傳誦以為天下大老歸之纔四十餘日復有宮祠之命遠近相弔以為天下大老去之則人誰不欲去者若正人盡去陛下何以為國願亟還朱熹無使小人得志養成亂階時侂冑勢方盛人皆為仲鴻危之熹以十月辛卯入見中間進講者七內引留身奏事者再面對賜食各一在朝甫四十有六日

講義曰甚矣君子之道難行而小人之奸易售也昔哲宗初年伊川先生入在講筵未幾羣吠紛紜遂有西監之除今寧宗新政晦庵先生入侍經幄未幾權倖媚嫉遽有官觀之命嗚呼此小人排擯道學之漸

歐自是而後臺諫揮彈一則曰偽
學二則曰偽黨已醞釀於此時矣

熹被召之初奏事行宮便殿有曰發號施令無一不出
乎朝廷進退人才無一不合乎公論不為偏聽以啓私
門則孽蘖之萌不得作矣今日之計莫大於此又再三
面言之又約吏部侍郎彭龜年同請對因發侂冑之奸
適龜年出護使客侂冑益得為計熹累曰汝愚當以厚
賞酬其勞勿使預朝政且有分界限立紀綱防微杜漸
謹不可忽之語汝愚方謂其易制不之虞仲鴻汝愚客

也力諫不聽而所倚為腹心謀事者又皆持祿苟安無復遠慮右正言黃度欲論侂冑謀泄以內批斥去熹不勝憤遂因講畢奏疏極言四事其一略曰聞有旨修葺舊日東宮為屋三數百間外議皆謂陛下意欲速成早遂移蹕以為便安之計臣恐不惟上帝震怒災異數出正當恐懼修省之時不惟興此大役以拂譴告整動之意亦恐畿甸百姓饑餓流離陷於死亡之際忽見朝廷大興土木修造宮室但以適己自奉為事而無矜惻憫

憐之心或恐怨望忿切以生他變不惟無以感格太上
皇帝之心以致未有進見之期亦恐壽皇在殯因山未
卜几筵之奉不容少弛太皇太后皇太后晨昏之養尤
不可缺而四方之人但見陛下大治宮室速得成就一
旦翩然委而去之六軍萬民之心必有扼腕而不平者
矣此臣之所大懼也其二略曰壽康定省之禮邇日一
再過宮亦未得見泛然而往泛然而歸太上皇帝聞之
必以為此徒備禮而來實無必求見我之意其深閉固

拒而不肯見固亦宜矣又聞太上皇后懼忤太上皇帝之意不欲其聞太上之稱又不欲其聞內禪之說若但一向如此則父子之間上怨怒而下憂懼將何時而已乎此又臣之所大懼也其三略曰朝廷紀綱尤所當嚴今陛下即位未能旬月而進退宰執移易臺諫皆出於陛下之獨斷大臣不與謀給舍不及議正使實出於陛下之獨斷其事悉當於理亦非為治之體况中外傳聞皆謂左右或竊其柄而其所行又未能盡允於公議此

弊不革臣恐名為獨斷而主威不免於下移欲以求治而反不免於致亂蓋自隆興以來已有此失臣嘗再三深為壽皇論之尚賴壽皇聖性聰明更練世事故於此輩雖以驅使之故稍有假借實亦陰有以制之未至全墮其計然積習成風貽患於後其害已有不可勝言者如陳源袁佐之流皆陛下所親見奈何又欲襲其跡而蹈之乎此又臣之所大懼也其四略曰殯宮之卜偏信臺吏之言而不復廣詢術人以求吉地既不為壽皇體

魄安寧之慮又不為宗社血食久遠之圖夫以壽皇之
豐功偉烈百世不忘而所以葬之如此其草草也豈不
大拂天人之心以致變異之頻仍而貽患於無窮乎此
又臣之所大懼也臣老病之餘寒齋獨宿終夜不寐憂
慮萬端至於孤危之蹤不敢自保切恐自今以往不獲
久侍清閒之燕矣疏入侂冑大怒陰與其黨謀去其為
首者則其餘去之易耳所謂首者蓋指熹也熹時急於
致君知無不言言無不切亦頗見嚴憚於是侂冑之計

遂行及熹講筵留身再乞施行前疏退則內批徑下矣
未幾除知江陵府湖北安撫熹辭不拜乃除提舉南京
鴻慶宮 詔兩省臺諫侍從各舉宗室有文學器識者

二人 壬午詔曰親君子遠小人慶厯元祐之所以尊
朝廷也省刑罰薄稅斂慶厯元祐之所以惠天下也朕
幸業承祖武而敢一日忘此乎掇取美號於以紀元其
以明年為慶元元年 十一月甲午安南國王李龍翰
加濟美功臣 丙午車駕自重華宮還大內 庚戌韓

仇胄兼樞密都承旨 辛亥雨水冰 戊申詔均內外
任時趙汝愚當國言者以為今賢士大夫往往不樂為
外官蓋外權太輕雖欲有所施設而不得騁故也今日
之勢莫若稍重外重外之術必使帥漕總領可以馴致
於從官而後可久任可久任而後可以責事功詔可未
幾汝愚去位亦不克行 詔曰三年之喪古有彛制朕
勉承為後寅紹邦圖仰孝宗之家法具存宜眇躬惟古
道是復以盡厚終之義以昭尊祖之誠朕當遵用三年

之制其令禮官條具典禮以聞初高宗之喪孝宗為三年服及孝宗之喪有司請於易月之外用漆紗淺黃之制蓋循紹興以前之舊朱熹之在講筵也不以為然奏言今已往之失不及追改惟有將來啓殯發引禮當復用初喪之服則其變除之節尚有可議望明詔禮官稽考禮律豫行指定其官吏軍民方喪之服亦宜稍為之制勿使肆為華靡其後詔中外百官皆以涼衫視事蓋用此也初熹上議時門人有疑者熹未有以折之後讀

禮記正義喪服小記為祖後者條見其所引鄭志有諸侯父有廢疾不任國政不任喪事之問而鄭答以天子諸侯之服皆斬之文乃知經文有所未備而待於傳注者如此因自識於本議之後云 陞明州為慶元府

乙卯孝宗皇帝權殯於永阜陵 十二月丁巳朔禁民間妄言宮禁事 己未淑妃張氏薨 乙丑吏部侍郎彭龜年上疏言韓侂冑假託聲勢竊弄威福乞黜以解天下之疑讀劄子畢又奏只緣陛下近日逐得朱熹太

暴故欲陛下亦亟去此小人毋使天下人謂陛下去君子如此之易去小人如此之難上初欲兩罷之汝愚開陳欲兩留之既而內批彭龜年與郡節度使吳玘嘗言時上無堅留侂冑意使有一人繼之則去之必矣侂冑既留勢益張因欲併逐汝愚而難其名或教之曰彼宗姓誣以謀危社稷則一網盡矣侂冑然之戊辰以陳康伯配享孝宗廟庭

李心傳曰光堯之祔廟也楊廷秀獨謂張魏公有復辟功不與配食為非宜與洪景盧爭之不能得固乞

補外泊孝宗祔廟議者復推陳魯公而魏公終不得預蓋但以富平淮西符離三敗之故而不考曹彬岐溝之役其喪師處國亦不下於富平與符離今以一眚掩其大德蓋景盧兄弟皆湯思退舊客夙有憾於魏公故以復辟之勲歸之呂元直也

己巳陳騭罷庚午余端禮知樞密院事京鏜參知政事吏部尚書鄭僑同知樞密院事彭龜年罷韓侂胄進一官與在京宮觀趙汝愚請留龜年不聽辛未劉

德秀劾劉光祖罷癸酉金主遣使來賀登位名孝

宗廟樂曰大倫之舞甲戌祔孝宗神主于太廟丁丑

德音降臨安紹興府死罪以下囚釋杖以下民緣殯宮
役者蠲其賦 癸未金主遣使來賀明年正旦 是歲
兩浙淮南江東西路水旱蠲其賦賑之

宋史全文卷二十八

欽定四庫全書

宋史全文卷二十九上

宋寧宗一

乙卯慶元元年上光宗皇帝第三子也母曰慈懿皇后
李氏光宗在泰邸慈懿夢日隊於庭以手承之已而有
娠孝宗乾道四年十月丙辰秋分而生上五年正月賜
名十一月乙丑授右千牛衛大將軍淳熙五年十月戊
午除明州觀察使封英國公七年二月戊辰初就傅孝

宗諭輔臣妙簡儒臣為小學教授遂以命秘書省正字
楊輔時上年十三矣明年輔補外以校書郎劉先祖代
之光祖請講誦祖宗故事以為日課九年正月冠十年
九月己巳始預朝參十一年當出閣兩宮愛之不欲令
居外乃建第東宮之側以十月甲戌遷焉十二年三月
乙酉除安慶軍節度使封平陽郡王八月辛酉納夫人
韓氏十六年二月光宗受禪三月己亥拜少保武寧軍
節度使進封嘉王賜外第上自弱齡尊師而重傳朝廷